



PORTAVÓS
VI GOVERN U
KONSTITUSIONÁL



KOMUNIKADU
BA MEDIA

Díli, Loron 21 fulan-agostu tinan 2017

Aprezentasaun dokumentáriu kona-ba iniciativa Hadeer Timor-Leste

Inisiativa Hadeer Timor-Leste (“Timor Awakening”) maka programa ida ne’ebé halibur veteranu sira timoroan no austrálianu, oras ne’e apresenta ona iha dokumentáriu, ne’ebé loke ona ba públiku iha loron 18 fulan-agostu. Primeiru-Ministru, Rui Maria de Araújo, hahii filme ne’e tanba hatudu susesu husi programa ida ne’ebé “iha impaktu pozitivu tebes ba veteranu sira no sira-nia família ninia moris”

Iha fulan-jullu tinan 2016, [Gabinete Primeiru-Ministru, fó-sai ona ninia apoiu ba iniciativa ida-ne’e](#), ne’ebé buka atu promove sorumutuk entre antigu militar austrália nian sira no veteranu sira husi Rezisténsia timoroan nian. To’o ohin loron, iha vizita haat iha loron 10 nian mai Timor-Leste, timoroan 100 no australianu 83 maka partisipa.

Inês Almeida, Ofisiál Ligasaun ba Asuntu Veteranu sira husi Gabinete Primeiru-Ministru nian no Coordenadora Programa Hadeer Timor, hateten katak ba Timor-Leste rezultadu sira ne’ebé valiozu liuhusi iniciativa ida-ne’e maka relasaun ne’ebé metin entre veteranu timoroan sira no veteranu austrálianu sira, impaktu terrapeútiku husi fahé istória entre kombatente sira no desenvolvimentu turizmu istóriu.

Kona-ba aspetu ida ikus ne’e, asaun importante ida maka loke ba públiku [Abrigu Rezisténsia nian iha Osu, Vikeke](#), iha fulan-jullu tinan 2017, ne’ebé oras ne’e bele dada turista sira atu mai vizita. Estudu kona-ba habelar asesu ba fatin barak seluk ne’ebé halo parte ba patrimóniu kulturál istóriu úniku nasaun nian la’o daudaun, tanba patrimóniu sira ne’e soi potenciál boot ba polítika desenvolvimentu turístiku Timor-Leste nian.

Dokumentáriu ho durasaun minutu limanulu ne’e, ne’ebé ko’alia uza lian tetun, sei tau lejenda iha lian inglés.

Portavós Governu nian, Ministru Estadu Agio Pereira, hateten katak “iniciativa Hadeer Timor hanesan programa ida ne’ebé maka di’ak tebes. Ami hato’o parabéns ba ema hotu ne’ebé envolve ona - organizadór, uma-na’in, dirigente no partisipante sira. Maneira simpátika no positiva ida-ne’e atu valoriza veteranu sira, atu tau-matan ba sira-nia moris-di’ak, atu harii lasu amizade no solidariedade, no atu simu ema hotu ho laran di’ak, kontribui duni ona ba relasaun di’ak ida ne’ebé dura ba tempu naruk entre Timor-Leste no Austália”. **REMATA**



Agio Pereira

+670 7723 0011

agio.pereira@cdm.gov.tl

govtlmedia@gmail.com

www.timor-leste.gov.tl